

15/10/1997

Putrajaya tersedia warisan teknologi terkini

Khairul Anuar Samad

KONSEP kabel berserabut di bawah bandar raya tidak akan wujud dalam usaha pembangunan Bandar Raya Baru Putrajaya, kata Perdana Menteri, Datuk Seri Dr Mahathir Mohamad.

Ini bersesuaian dengan kelebihan pada Putrajaya yang mana kewujudannya nanti akan dibina tanpa perlu mewarisi sebarang teknologi dan prasarana lama.

Pada pandangan Dr Mahathir, mengamalkan teknologi dan prasarana lama itu mampu menjadi halangan dalam pelaksanaan teknologi semasa serta yang bakal dicipta.

"Apa yang pasti, Putrajaya sudah tentu tidak akan mempunyai kabel berserabut itu, yang hanya mampu menyokong penghantaran suara, data dan imej pada kelajuan 43Mbps, umpamanya," katanya di majlis pelancaran bandaraya baru Putrajaya, di Kuala Lumpur, minggu lalu.

Putrajaya boleh dibangunkan dengan prasarana maklumat paling baik dan terkini seperti rangkaian gentian optik bagi jalur lebar setinggi 2.5Gbps dan 10Gbps.

Keupayaan itu bertujuan menyokong teknologi semasa, teknologi baru dan teknologi yang akan dicipta yang mana boleh digunakan dalam persekitaran Kerajaan elektronik.

"Dengan ini, kita dapat pastikan kita tidak meletakkan Malaysia dalam perahu yang bergerak perlahan dari segi pelaksanaan Kerajaan elektronik."

"Sebaliknya, Malaysia akan berada di laluan pantas untuk membolehkan negara merebut peluang yang dibawa oleh Zaman Maklumat," katanya.

Putrajaya yang akan dibangunkan pada tapak seluas 4,581 hektar menumpukan kepada keserasian dan suasana yang harmoni antara manusia, alam semula jadi dan teknologi.

Pusat pentadbiran baru Kerajaan yang berharga RM24 bilion, akan menjadi pusat Kerajaan elektronik, mencerminkan kejayaan simbiosis manusia, alam dan teknologi.

Ia dibangunkan oleh Putrajaya Holdings Sdn Bhd dan rakan usaha samanya iaitu MRCB, Peremba, SP Setia, Hong Leong Properties dan Malaysian Plantations.

Bandar raya itu akan menjadi bandar raya alaf akan datang yang bersifat Malaysia sepenuhnya selain menjadi bandar raya unik yang dibina dengan semangat Malaysia dan untuk semua rakyat Malaysia.

(END)